

Sagardoaren kultura sustatzeko elkarlanean

Usurbil, Hernani eta Astigarragak sagardoaren kultura elkarlanean sustatzen segitzeko hartua duten konpromisoaren erakusle, ondoko irudia. Sagardoaren Lurraldeko kide diren hiru udalerrietako alkateak dituzue argazkian, sagardo basoa eskutan dutela, asteazkenean Hernaniko Zelaia sagardotegian ospaturiko 23. Sagardo Berriaren Egunean; Usurbilgo alkatea, Xabier Arregi; Astigarragakoa, Jesus Mari Santos; eta Hernanikoa, Luis Intxauspe. Hiru udalerriek iaz sinatu zuten, eremu honetan elkarlanean jarduteko hiru urterako hitzarmena.



Usurbil, Astigarraga eta Hernaniko alkateak, txotx garaia irekiera ekitaldian.

Sagardoaren kultura sustatu nahi dute; besteak beste, Sagardoaren Lurraldea markapean sartu, Sagardo Bideak sortu, Sagardoetxea Museoa parte hartu eta ekitaldi berriak bultzatu asmo dituzte.

23. Sagardo Berriaren Egunean, edo bestela esanda, 2016ko txotx denboraldia ofizialki abiatzeko, urtarrilaren 13an Astigarragako Sagardoetxean izandako aurkezpen ekitaldian erakundeen arteko elkarlanean sakontzeko apustua berretsi zuten. Eta jada, eskuartean dituzten zenbait egitasmoren lehen xehetasunak aurreratu zizkiguten.

“Sagardo ibaiak, bizitza iturri” erakusketa ibiltaria

Testuinguru honetan, eskuartean duten lehen proiektuaren xehetasun batzuk aurreratu dizkigute jada; Astigarragako Sagardoetxeak, bertako udalarekin, Hernani eta Usurbilgoekin, eta Donostiako Aquarium-arekin batera elkarlanean

ERAKUSKETA BEGIBISTAN

“Oria eta Urumea ibaien iraganak, sagardoaren inguruko hainbat sekretu ezkatzen omen ditu eta horiek aireratzera doa udaberrian gure artean izango dugun erakusketa”

landu duten “Sagardo ibaiak, bizitza iturri” egitasmoa. Apirilean inauguratuko den erakusketa ibiltaria dugu. Usurbila ere ekarriko dutena.

Urumea eta Oria ibaien garrantzia

Oria eta Urumea ibaien iraganak, sagardoaren inguruko hainbat sekretu ezkatzen omen ditu eta horiek aireratzera doa udaberrian gure artean izango dugun erakusketa.

Udal, probintzia eta estatuko artxiboetan eginiko ikerketen

emaitza da “Sagardo ibaiak, bizitza iturri” egitasmoa. Orain arte ezezagunak ziren hainbat datu interesgarri eta bitxiak bilduma.

Aipaturiko bi ibaiok, “bi bailara hauetako bizilagunen komunikazio eta harreman ekonomikoen antolaketan eta Gipuzkoako garapen historikoan berebiziko garrantzia izan zutela erakutsi digute”, Astigarragako Sagardoetxetik aipatu digutenez.

Antza, Oria eta Urumea, “aintzina Gipuzkoak izan zuten bi bizitza iturri nagusiak eta bere bizilagunentzako aberastasunaren iturri izan ziren. Une batzuetan, gainera, gune aurrendariak eta puntako teknologiadunak izan ziren eta beren ur-bazterrek istorio ugari eta askotarikoen lekuko izan ziren, esaterako: XVIII. mendeko langileen greba, Ergobiako bidesarian ordaindu behar zen tasa, itsasoa eta portuekin erlazionaturiko zenbait ogibidetan soldataren zati bat ordaintzeko sagardoa erabiltzea,

Astigarragako alkate bizargina eta Murgiako Jaunen haserre, Ignacio de Soroa untzigile usurbildar ospetsuaren amodio-kontuak...”.

“Sagardo Bide” berriak lantzen

Apirilean inauguratuko duten erakusketa ibiltaria, sagardoaren eskualdea zeharkatzen duten Oria eta Urumea ibaien “ahalmen turistiko eta kulturala” balorean jartzera dator. Erakusketa antolatzeke lanean dihardute, egitasmo honen atzean dauden erakundeek; tartean, Usurbilgo Udalak. Baina honez gain, badute eskuartean bestelako proiekturik ere; esate baterako, Sagardoaren Lurraldea ezagutzeko “ibilbide tematiko edo “Sagardo Bide” berriak martxan jartzeko lanetan” dihardute. Aurrerago eskainiko dituzte zehaztasun gehiago.